

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Prime Minister Narendra Modi kaihhruai NDA sawrkar kaltlanga tanpuina dawngtu Vairengte tualchhung mi ten an chhawr tangkai thu an sawi.
- 2. Sawrkarin Passenger phur chi lirthei hrang hrang Mizo Taxi Online Booking application hmang tur a a tih chu chu Taxi khalh pawl hrang hrang ten hman loh ni se tiin thuchhuah intawm an siam.
- 3. Chief of Defence Staff (CDS) thar General N S Raja Subramani chuan ngahtuahna thar hman leh a taka thiltih chu sipaite theihna tihhmasawna tur a ni a ti.
- 4. Myanmar hmarchhak Kaungtpu khuaa in pakhata thil puakah mi 45 an thi..

<><><>

12 YEARS OF NDA GOVT

Prime Minister Narendra Modi kaihhruai NDA sawrkar kaltlanga tanpuina dawngtu Vairengte tualchhung mi ten an chhawr tangkai thu an sawi.

Vairengte-a Akashvani Correspondent Doreen H. Sangmawii'n Vairengte-a cheng sawrkar laipui scheme chhawr tangkai hrang hrang a kawmna ah mipuiten an chhawr tangkai thu an sawi a, hamthatna hrang hrang an dawn chuan an khawsak a ti awlsam an ti a, chenna in neilo ten sawrkar kaltlangin chenna in an neih thu an sawi a, PM-Kisan kaltlangin loneituten tanpuina an dawng tih sawiin Ayushman Bharat hnuai Golden Card nei ten an hman tangkai thu an sawi baw.

Prime Minister Narendra Modi kaihhruai NDA sawrkar hian kumin hian a kum 12-na a tling a, hemi pual hian Akashvani News Aizawl chuan sawrkar laipui hmalakna hrang hrang mithiamte a kawm a, henge hi Akashvani News Aizawl youtube channel leh Social media hrang hrang hmuh leh ngaihthlak theihin a awm a ni.

<><><>

TRAFFIC

Aizawl Traffic Police-te chuan waviin atangin kea kalte kawng kannu tur, Zebra Crossing kaihhnawiha dan bawhchhiate lakah na zawkin hma a la tan dawn.

Aizawl Traffic Police Superintendent Pu C. Vanlalvena'n thuchhuah a siamah chuan, Aizawl khawpui hmun hrang hrang mipui ke-a kalte him zawk nan leh traffic enkawl na a felfai theih zawk nan Zebra Crossing-te siam a ni a. The Motor Vehicles (Driving) Regulations, 2017 Rule No. 9 leh 22 (iv)-in a sawi angin Lirthei khalhtuten Zebra Crossing thlen dawnin fimkhur taka tlan muan a, kawng kan turte tana a hlauhawm leh hlauhawm loh en lawk thin tur a ni a ti a. Zebra Crossing-ah lirthei din phal a ni lova, hei hian traffic jam laia din te, lirthei atanga chhuk leh in phur (pick & drop) bakah bungrua load leh unload chhungte pawh a huam vek tih a sawi a.

Waviin atangin Aizawl Traffic Police-te chuan Zebra Crossing kaihhnawiha dan bawhchhiate lakah na zawkin hma a la dawn tih sawiin, Dan bawhchhiate chu The Motor Vehicles (Amendment) Act, 2019 section 177 leh section 184 angin hrem theih an ni a ti a. Ke a kalte pawh kawng kan dawna fimkhur taka kawngpuite enchiang hmasa thin turin a ngen a ni.

<><><>

MIZO TAXI ONLINE

Sawrkarin Passenger phur chi lirthei hrang hrang Mizo Taxi Online Booking application hmang tur a a tih chu chu Taxi khalh pawl hrang hrang ten hman loh ni se tiin thuchhuah intawm an siam.

Mizoram Taxi Association (MTA), Aizawl Two Wheeler Taxi Association (ATTA) leh Aizawl District Auto Rickshaw Owner Association (ADAROA) hruaitu thukhawm chuan Mizo Taxi Online Booking application hi hmanglo turin thuchhuah intawm an siam a, thu leh awm hma chu Application Download lo tur leh in ziaklut lo turin an member te an hriattir a ni.

STA thuchhuah tarlan danin Mizo Taxi Online kalpui turah hian Taxi te in register a, registration tih manah, kum tin Rs 600 /Rs1000 chawi ngai turin thu a chhuah a, hemi chungchangah hian passenger phur lirthei khalhtute chuan man chawi ngai a application hmang tura in register a ngai chu tha antih loh thu anlo thlen tawh a ni.

(Desk)

<><><>

FUEL PRICE

Tuialhthei man pung zel avangin lirtheia eizawngten harsatna an tawk chho mek a, hetiang zela tuialhthei man a san chhoh chuan thil man pawh a sang chho tura rin a ni.

West Asia buaina kaihhnawihah US leh Israel-in Iran an hun hnu-ah tunthla ni 15 khan a vawi khat na'n India ramah tuialhthei man tihsan a ni a, vawiin thleng hian ni 14 chhungin tuialhthei man hi vawi 5 danglam tawhin, vawi 1 chu a tlahniam a, a bak zawngah chuan a sang a ni. Kar hmasa Inrinni kha tuialhthei man pun hnuhnug ber a ni a, litre khatah petrol chu Rs 2 leh pawisa 58-in a sang a, diesel chu Rs 2 leh pawisa 56-in a sang. Tun dinhmunah Aizawlah petrol liter-1 Rs 106 leh pawisa 39 leh diesel litre-1 Rs 95 leh pawisa 7 a ni mek.

Akashvani News Aizawl chuan Aizawl khawpuia lirthei hmanga eizawngtute leh sumdawng thenkhat kawmin, tuialhthei man sang hian an eizawna-ah nghawng a neih dan a zirchiang a; sumdawngte chuan bungraw lak chungchangah harsatna an la tawh rih lo nia an hriat thu an sawi rualin, tuialhthei man a san reng chuan thil man pawh a san chhoh thuai an rin thu an sawi a ni.

<><><>

WEATHER

Khawchin thlir lawktuten tunhnaia ruahsurah chhiatna hrang hrang a thlen theih avangin mipuite fimkhur turin an chah.

IMD, Aizawl Director Pu Sudheer Dwivedi chuan Akashvani News Aizawl in a kawmna ruahsur chuan ni 2 atanga ni 3 a awd dawn a ti a, ruahsur hian Mizorama District hrang hrang tuamin ruah bakah hian thli leh rial te pawh thawk thei ani a ti bawh.

Leimin tamna Mizoramah chuan mipuite fimkhur turin IMD Director chuan a chah a, hei bakah hian lirthei khalhtute pawh fimkhur turin a chah bawh a ni.

(Desk)

<><><>

CBI ON LENGPUI LAND

Central Bureau of Investigation (CBI) chuan Indian Air Force tana Lengpui rama mimal ram lei chungchanga dan bawhchhiatna awm ni a sawi chu an chhui tan.

Lengpui a Parchhingcheng ram an tih a tira neitu (original land holder) thenkhatin Akashvani News Aizawl an hirih danin CBI officer-te hi tawng lettute hruai-in Lengpui khua-ah Ningani khan an kal a. A tira ram neitu thenkhat chu Lengpui VC House-ah kokhawmin thil an zawtfiah a. He tah hian Lengpui VC pawh koh ve a nih thu an sawi. CBI official-te zawhna chhangin ram neitute chuan sorkarin an ram a lei khawm tih an hriatpui hauh loh thu leh an hming ziah hnan ni a lehkha thenkhat a lang pawh chu anmahni ziah a nih loh thu a sawi a. An hming ziah ni awm tak chu a lem a nih thu an sawi. VC-te pawhin mimal ram laksak a nih leh Garden LSC a leh a nih dawnin ram teh a awm a nih pawhin an hriatpui loh thu an sawi bawh. Ram neitu zinga pakhat chu Aizawl a awm a ni a, a hriselna a that loh avangin an kal chilh niin an sawi bawh a ni.

(Desk)

<><><>

SPECIAL INTENSIVE REVISION

Inrinni, May ni 30 kha state leh UT engemawzat ruala Mizorama Special Intensive Revision (SIR) of Electoral Rolls kalpui tan hun a nih lai-in a takah chuan vawiin Thawhtanni atangin huapzau taka kalpui tan a ni dawn.

Chief Electoral Officer (CEO) thuchhuah chuan Inrinni atang khan SIR hi kalpui tan a nih thu a sawi a. District hrang hrang a Booth Level Officer (BLO)-te'n anmahni huam chhung theuhah in tin an tlawh tan dawn a. In tin tlawh hna hi ni June ni 28 thlen kalpui tura ruahman a ni. He mi hun chhung hian in tina voter tuna electoral roll-a chuang mek te, Electoral Roll siam thar tura thun dilna Enumeration Form chu vote nei zawng zawng tan copy 2 theuh an sem ang a. Copy khat la letin copy khat dang leh chu vote neite'n an kawd dawn a ni. BLO te hian a tul angin voter te Enumeration Form an dah khahpui ang a. Enumeration Form dahkhah sa chu BLO ten an khawn khawm leh dawn a ni. Hemi bakah hian Enumeration Form an lak khawm saa voter-te dinhmun kimchang chu BLO app hmangin online ah an thun leh dawn a ni.

Tun dinhmunah Mizoram chhungah Vote nei nuai 8, sing 7, sang 5 leh 68, (mipa - nuai 4, sing 2, sang 3 leh 397 hmeichhia - nuai 4, sing 5, sang 1 leh 671 an awm mek a ni.

(PR)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PRISON MINISTRY

Synod Prison Ministry-in Mizorama lungin 10 a zirchianna-ah Jail tang za a 76 point 7 te chu thalai kum 18 atanga kum 40 inkar an ni a, an tan chhan tam ber chu ruihhlo a ni.

Synod Prison Ministry-in nikum June ni 16-a Inspector General of Prison phalna an dil anga Mizorama Jail 10-a mi tang 1,735 te an zirchianna chu tun hnai khan a tichhuak a. Jail tang zawng zawng zinga za a 76 point 7 te chu thalai kum 18 atanga kum 40 inkar an ni hlawm a. Tang zingah kum 60 chunglam engemawzat awmin, an tan chhan tam ber chu kumtling lo pawngsual thubuai, POCSO, 2012 thubuai a ni a. Zirchianna chuan mipat-hmeichhiatna lama inthlahdahna leh sual dang a inzawm thuk hle ni-a sawiin, Jail tang zingah kum 18 tlin hmaa mipat-hmeichhiatna hmang tawh zaa 58 point 3 an awm a. Tang zingah lehkhah zir sang lo an tam hle a, pawl 12 leh a hnuai lam chu za a 91 point 3 an ni a ti bawh.

Jail tangte tan chhan tam ber chu ruihhlo niin, zu/ruihlo ti leh ruihhlo tawlhruk vanga tang belhkhawm chu za a 47 point 8 a ni a. Rukru/mi rawk vanga tang zaa 25 point 5 niin, pawngsual/khuaikhem/POCSO thubuai vanga tang chu za a 18 a ni a. Tualthat, ram dan bawhchhiatna dang vanga tang belhkhawm chu za a 19 point 9 a ni bawk.

<><><>

CDS

Chief of Defence Staff (CDS) thar General N S Raja Subramani chuan ngahtuahna thar hman leh a taka thiltih chu sipaite theihna tihhmasawna tur a ni a ti. Nimina a hna thar a zawm hnua chanchinbumite a kawmnaah General Subramani chuan thawhona tha neih a pawimawh thu sawiin sipaite, industry-te, zirna sang lama thawkte, startup te leh zirbingna lama thawkte chu hmasawna thlen theitu vek an nih thu a sawi a ni.

General Subramani New Delhi-a South Block Lawns ah sipai chawimawina Gaurd of Honour pek a ni a. Hemi hnu hain National War Memorial ah pangpar a dah bawk a ni.

(Newsonair)

<><><>

MYANMAR EXPLOSIVE

Myanmar hmarchhak Kaungup khuaa in pakhata thil puakah mi 45 an thi. Thudawn danin he inah hian lung lakna hmuna hman thin puak thei thil dahkhawm a ni a. He chhiatna thlengah hian mi 70 chuangin hliam an tuar bawk a. China ramri atanga km 3 vel chauha hla niin Ta'ang National Liberatin Army te thunun khuaa a ni a. He hnam sipai hi Myanmar sawrkar nena indo mek a ni a.

Chhanchhuah hna thawh nghal a ni a, mitthi zingah hian naupang 6 an tel nia thudawn a ni.

(Newsonair)

<><><>

MYANMAR PRESIDENT

Myanmar President U Min Aung Hlaing leh Prime Minister Narendra Modia te chu vawiinah New Delhi-ah an inkawm dawn. Hruaitu pahnihte hian ram pahnih inkara thawhdunna tihchak leh inzawmna tihngheh dan tur an sawidun dawn a. India leh Myanmar inkara thawhdunna hrang hrng venhimna leh inkalpawhna te sawilan a ni dawn a ni. National Security Advisor Ajit Doval chuan nimin khan New Delhi-ah President U Min Aung Hlaing hi a lo kawm tawh bawk a ni.

(Newsonair)

<><><>